

武鄉縣志

重修武鄉縣志序

武邑志自康熙三十一年重重修迄今九十有八年矣時屆

重熙風教之涵濡無遺下里光依

且人文之炳郁不間一隅每逢報政之歲前令之循績可師亦越掄才之期多士之科名足羨兼以德著彝常文歸典則發潛光於耆宿表淑志於深閨皆足以上維教令下振風俗而或未登簡冊無以備輶軒而光史乘伊誰之責余甫蒞茲土即欲續增成編以補前志之所未備顧自揣不文未獲登作者之堂是以拳拳於心閱八載未敢操筆然分終無可辭迺擇日集僚屬延本邑紳士素所信者謀取舊志而增修之皆欣然樂襄茲舉旋即分類並輯上稽歷史旁參舊聞並諭各鄉長廣庶軼事以

收散失而余亦時於公餘之暇共相商確務期允當不三月而稿成將謀梓矣諸公請余言以弁其首竊謂武邑崇山峻嶺土田磽确無平原沃壤可資富饒然其俗淳樸男耕女織積年無逋欠讀書多俊秀擢巍科履仕版者纍纍不絕官其地者但能如其俗與相休息即可盡職焉余賦性無華與其土尤相宜是志之修非以侈聲譽也事取其詳語歸於實其已載前志者約略悉仍其舊即間有更易祇緣相沿成訛自應悉心校正以傳永久至前志所未及載而今乃補之者閱歲既久敘述頗繁亦未敢稍涉敷陳自詡瞻博母亦惟是官紀其仁士著其遇出則考其猷爲處則觀其述作言規而行矩其品可欽守高而志一其節足尙第使見者生敬聞者生慕則感發興起之風於是乎

在而又何鋪張揚厲之足云諸公其以余言爲然乎否是爲序
皆

乾隆五十五年歲次庚戌十一月望日文林郎知武鄉縣事加
三級白鶴長白山人薩克達氏秀千甫題於署之曠然樓

武鄉縣志序

秀千明府白公蒞任之八年於武邑風土民情既灼然有以周知其故而其教令所及務與民休息相安而民亦樂與安之而不忍違所古稱良有司之風殆庶幾焉余假歸在籍嘗於晉謁之下聆其言論肫懇盎然流溢於容色作止之間其至性有過人者一日談及邑志前明以往作者無可稽溯我朝順治二年臨沼李公芳莎曾經纂輯祇緣兵燹之後掃撫無從未免畧而弗脩康熙三十一年三韓高公中舍復加增修是時民物康阜典籍彰明乃克完善迄今將近百年叨

聖恩於疊沛樂利駢臻仰

帝治於重熙人文蔚起凡可登諸簡冊以照示來茲者視前倍有

武進縣志
加矣自非及時續增恐異日淪失莫考或亦守土者之責也
公於是毅然自任而屬操筆於余余甚難之竊謂邑志與國
史同國史所論列者邑志悉具故國史待邑志以成武本小
邑而山川廣袤之形田賦高下之等政治繁簡之故俗習淳
澆之由官其地者考績蜚百里之聲生其土者登俊廣三途
之進逮夫一德一行之長爲閭里所稱述亦必特加表揚以
示鼓勵我

國家省方問俗之至意莫踰於此不綦重與維時魏公孟和出
其先君子一舉所著武志續稿條理井然原委胥備復延邑
中能文諸友相與共襄此舉余旣幸得所先資而又商確多
人乃敢應命爰仿諸同事即前兩公舊志並續稿所增入者

重加檢閱復上稽歷代各史及省郡各志互相參質俾歸畫一其規制仍遵舊志而義關去取間亦出以己意者但求有合於敘述之旨則無爲從同也至舊志所未及載俱照續稿所增依類第次而閱時既久耳目難周且續稿亦有未及增入者因廣搜博考兼諭各鄉長諮訪故老隨所記憶羅厥散失每一成帙必與公細加研究不憚再四以求允協蓋採取惟期其詳而折衷必歸於當於焉化民成俗一邑之風教攸關因之考獻徵文曩時之典型俱在條分二十有九卷總以六將謀梓矣既冠公序於首而余與同事諸友亦得附載數言以記斯誌之始末云爾邑進士歷任山東濟南府知府史傳遠伯猷氏題於輯山書院之寓室時乾隆五十五年

十二月三日也

重修武鄉縣志引言

縣之有志所以紀盛衰徵疑信非徒摘華揚藻已也其間景物之互異俗尚之遞遷形勢之屢更與夫人文忠孝節烈之傳聞而流播雖一二十年間且時升而時降況中隔百餘年之久而不補亡拾缺重爲修輯後有作者幾何不撫積篋陳編而悼歎於墜緒茫茫之不可問也武邑之志可考者始於萬歷邑令張公諱五美至

國朝順治二年前令台辰李公諱芳蕩重修焉博大精深典贍詳要洵爲奕世模楷踵而行者第續以補之足矣逮康熙壬申前令中含高公諱鉉又一修焉輾轉因循遂沿於今興廢之以可勝道哉癸卯冬我

邑侯白公下車伊始凡生民之利病政治之源流一切諸大務靡不焦心勞慮則於百廢俱舉而後已庚戌因公接見話及邑志謂自雍正辛亥奉

旨勅修各州縣多所更新武雖褊小而科第連綿尙稱人文藪胡再不謀余因言甲午先嚴府君告病家居思襄其事廣搜博採彙爲四冊而大半取裁於李明府之舊本時縣令張公諱五典蓋鉅手也亦毅然以爲己任嗣先嚴即世張公亦以他務掛冠

故爾未付剞劂迄今又二十餘年矣幸蒙詢及脫稿猶存願脩大匠之庀材而飭用焉遂延史公進士傳遠家督布經大咸共相籌畫曰余自蒞武八年於茲每翻舊帙趣殷然以增修厯念特鞅掌鹿鹿而未有暇也抑風俗人心攸係綦重而未易操觚以從事也今得魏公粉本再四披閱規模已具從而討論修飾訂爲一書此固宰斯土者之責其何敢多讓爰集邑之賢而能文者或搜羅或增添或較對而余亦倖從諸公後纂修彙輯凡閱三月而功於以竣夫落落百餘年來其爲變更也屢矣臨文興歎不無杞宋之感一旦因者因革者革而並詳從前之所未及微我邑侯白公虛心諮訪不遺封非一破築室道謀之見而俾立章程邑中縱有一二好古之儒欲舉而修明之非格於勢禁即阻於怨望有日聽其塵封焉而已烏能綱舉目張展卷瞭如用以信今而傳後也哉

時

大清乾隆五十五年十二月三日庚子科亞元揀選知縣魏大履仲坦氏謹書

武鄉縣志元序

萬歷丙午歲五美張公宰是邑季父廷尉公養志其半子余從外祖也邑距吾鄉臨洛三百里竊從季父聞其梗槩雖貧敝禮義節俠範旁所錯諸州邑張公輯志告竣於己酉芳蒞時八歲及長讀其書如遊其地神交諸名貴有年矣

本朝定鼎初年仲冬芳蒞應薊撫雨恭宋公咨薦探籌是邑同儕憂其最陋恐以逋賦累屈指楊程諸僚咸不獲登啟事余弗深計曰處膏腴而不能自潤寧小而逸乃大而勞乎會大族魏程諸公苦偽政酷虐賊騎復盛爲疑兵窺浦曲南微望

新恩如乳下兒待哺自哂晡蓬何足齒乃人情爾爾或以余布恩而來者敢臯衆望乎拮据方五閱月察厥利病可得而言如彼先朝以宗支不億遞科王糧已秦晉豫遼濟師溢爲三餉名雖不同總居正賦之外今三餉蠲矣獨王糧未除且作賓三恪猶供億無以爲名此武鄉之害一也權店置郵自明季節裁輒率下逮皂棧輿舁削其貲太半勾攝馬園如捕重囚逋訟株連蔓引且以楚檣臨之若屬何罪此武鄉之害二也屬員節定相餉檄赤貧胥馳獻題糕角黍屠蘇鰕菹之屬懷

竊其半內鴨而代之鶩襲趙而淆以魯歸則詫物力騰貴丐直倍徙博一酣呼弊之宜更者此其一縣距權店百五十里梅驛旣焚行旌頓於蘭若極目荒山燎鐸不戒館夫庖人旣非孝子順孫但緩夏楚轉使星無所不至或晦夜呼燈袖出燭跋如螢積雪嚴霜烏薪不繼榻水火弱醴酒三行羹未盡而鐸斧有聲腥突來而下箸無處一呼則蹶再呼則喘顫啞控胥果其腹而令厚其顏弊之宜更者此其二風俗崇祝由禱祀好巫鬼佞佛腥酒拂面鬚鬢於思腕匣戒珠非釋非道婦不冠笄稚子幘屋內采問名任冰人口語旣無題葉又鮮儷皮貧陋者流得以朝秦暮晋牙角無虛日弊之宜更者此其三苦乃名卿巨族禮讓相先子弟恂恂無鮮衣怒馬卑庠第宅而郊外倚山傍水節略開園河近吹竈林密郵鳥地頗宜松花石相間時出觀遊醫簿書俗氣一快也孝廉學博安貧樂道焚膏繼晷詩馳瀾橋雪中志寄芙蓉鏡下過從偃室語不及私可借以彌縫匡救聞所未聞二快也山勢崢嶸河流奔放野花雜藥蠹穉撩人人民椎魯寒暴影瞰饑餐嫩蕨隨地取給有標枝野鹿之風縣治以東林木蓊蒨柯葉蒙糾偃僂出入秋深霜落五色燦

然詩料如許逸興軒軒霞舉不倦三快也府史與皂隸詐踵至然五枝易窮無巨
猾大慙挾吏短長進退筆曳懾伏有餘群鳥雀窺禾蘇東草爲人則審顧不下無
足深憂郭西泉水甘潔可瀹旗槍酒赤黃作琥珀色味重濁苦烈佃圃糞多力勤
蔬橈滑肥膩如膏一醉一飽所費甚廉不踦距而隱情出不簡墨而草竊銷四快
也夫害二弊三快四所樂不足匹所憂眉舒縮半心嚙遂結轡半以是風韻鄙鎖
文章吏事亦略相半然非文章無以飾吏事非邑乘無以寄文章乃邑乘自張公
纂集後缺略三十七年披閱舊書欲一筆削而更冗如蠅幸少司空鳳菴程公獨
任總袋魏孝廉星杓自主椽筆勞怨居十之九趙進士平符杜孝廉丹邱程拔貢
崑崙陳恩選景臯併彬彬大雅讐校不遺餘力至東壁圖書則李生之任右相丹
青則魏生彌大暨弟駟字攢鍾王則陳生曰喜另目紀續首李生正興魏生初盛
及弟閔大趙生夢麒張生幼學贊之芳莎得以叅伍折衷出四小序併諸文告詩
歌諸公忘其俚溷弗代藏拙濫災梨棗敢攘衆勞爲已有乎然是集計資百金皆
芳莎經營募募不兩月而粗定鉛黃殺青已具小勞附大典以光或以藏山或以

覆韻斯權在後人矣

重修武鄉縣志舊序

高 鉞

郡縣之志所以佐國史者也古者太史輶軒以觀民風採其事以上之天子天子命其臣書之方策垂示後世厥典重矣周衰諸侯各自爲史秦廢封建立郡縣漢唐因之而郡縣始有志每當國家修史時必博徵大下之志以考同異衆得失故曰所以佐史也顧史略而志詳史嚴而志寬史有專職而志無專官方今聖明御宇率士皆臣往歲

勅命儒臣纂修一統全志甚盛典也武鄉雖僻陋要爲股肱近地鉞不敏承乏茲邦八年餘矣夙夜兢兢恆以不稱厥職負

天子愛養元元之意是懼獨念此邑自三廢三建來頻經喪亂自明以前無專志遙始作志者自永年張公五美其時爲明之萬曆再作志者爲李公芳莎與張公同里其時爲

本朝順治之乙酉自乙酉至今四十餘年夫此四十餘年中天時之盈虛人事之盛衰物產之榮謝更變不知凡幾自非重加纂輯一旦

天子搜羅舊聞將何以應三十一年春特延邑生魏名振趙鐸寶飛龍李嘉賓李光春史珦關鍵李勵武九卿趙之相程康寫太學生崔懷璽等採訪遺事彙繳於鉅吏治之暇進退筆削幾於廢寢忘食閱三月而告竣前列凡例三十二條後分門類四十條而每類有總叙有總論人物則尤加意故一人有一傳一傳必有一論至後復繫以總論然猶恐朴陋無文貽笑士林適雲間宋子兩臣名蒼霖瞿子又陶名潛者館於荒署因而互訂是非庶免訛舛夫昔人修志往往假手本邑紳士而本邑紳士則未免易於取怨倘畏怨而少爲通融難成信史鉅既重其事因曲諒紳士所以獨任而不辭異日者輜軒所至省方問俗或可藉以少補云爾